

四庫全書

集部

欽定四庫全書

宋詩鈔卷十八

內閣中書舍人吳之振編

王安石臨川詩鈔上

王安石字介甫臨川人後居金陵亦號半山登進士
上第簽書淮南判官再調知鄞縣通判舒州召試館
職不就用為羣牧判官知常州移提點江東刑獄嘉
祐三年入為度支判官俄直集賢院明年同修起居

注知制誥糾察在京刑獄以母憂去終英宗世召不起神宗為太子時聞其名即位命知江寧府數月召為翰林學士兼侍講熙寧二年拜參知政事變行新法天下騷然罷為觀文殿大學士知江寧府再起為相屢謝病又罷為鎮南節度使同平章事判江寧府改集禧觀使封舒國公元豐三年復拜左僕射觀文殿大學士換特進改封于荆哲宗加司空卒贈太傅謚曰文配食孔廟追封舒王南渡後始罷從祀安石

少以意氣自許故詩語惟其所向不復更為涵畜後
從宋次道盡假唐人詩集博觀而約取晚年始悟深
婉不迫之趣然其精嚴深刻皆步驟老杜所得而論
者謂其有工緻無悲壯讀之久則令人筆拘而格退
余以為不然安石遣情世外其悲壯即寓閒澹之中
獨是議論過多亦是一病爾

元豐行示德逢

四山脩脩映赤日田背坼如龜兆出湖陰先生坐草室

看踏篝車望秋實雷蟠電掣雲滔滔夜半載雨輸亭臯
旱禾秀發埋牛尻豆死更蘇肥莢毛倒持龍骨挂屋敖
買酒澆客追前勞三年五穀賤如水今見西成復如此
元豐聖人與天通千秋萬歲與此同先生在野故不窮
擊壤至老歌元豐

後元豐行

歌元豐十日五日一雨風麥行千里不見土連山沒雲
皆種黍水秧綿綿復多稌龍骨長乾挂梁栢鱗魚出網

蔽洲渚荻筍肥甘勝牛乳百錢可得酒斗許雖非社日
長聞鼓吳兒蹋歌女起舞但道快樂無所苦老翁塹水
西南流楊柳中間棹小舟乘興欹眠過白下逢人歡笑
得無愁

純甫出釋惠崇畫要予作詩

畫史紛紛何足數惠崇晚出吾最許旱雲六月漲林莽
移我脩然墮洲渚黃蘆低摧雪翳土鳬雁靜立將儔侶
往時所歷今在眼沙平水澹西江浦暮氣沈舟暗魚罟

歌眠嘔軋如聞榜頗疑道人三昧力異域山川能斷取
方諸承水調幻藥洒落生綃變寒暑金坡巨然山數堵
粉墨空多真漫與大梁崔白亦善畫曾見桃花淨初吐
酒酣弄筆起春風便恐飄零作紅雨鶯流探枝婉欲語
蜜蜂掇藥隨翅股一時二子皆絕藝裘馬穿羸久羈旅
華堂豈惜萬黃金苦道今人不如古

招約之職方并示正甫書記

往時江總宅近在青溪曲井滅非故桐臺傾尚餘竹池

塘三四月菱蔓芙蕖馥蒲柳亦競時冥冥一川綠方坻
最所愛意謂可穿築欲往無舟梁長年寄心目故人晚
得此心事付草木消搖欄宇新攬結蹊隧熟更能適我
願中水開茅屋鬼營誅荒梗人境掃喧黷濠魚淨留連
海鳥暖追逐豈無方外客於此停高躅憶初桑落時要
我豈非夙蠶眠忽欲老一个未言速當緣東門水尚澀
南浦舳吾廬雖隱翳賞眺還自足橫陂受後澗直塹輸
前瀆跳鱗出重錦舞羽墮輓玉碧簫遞舒卷紫角聯出

縮干枝孫嶧陽萬本母淇澳滿門陶令株彌岸韓侯藪
尚復有野物與公新聽矚金鈿擁蕪菁翠被敷苜宿蝦
蟆能作技科斗似可讀櫺軒俯北渚花氣時度谷耘耔
聊效顰締構行可續荒乘倘不倦一晝敢辭卜雖無北
海酒乃有平津肉脩脩仙李枝城市久煩促寄聲與俱
來蔭我臺上穀

寄吳氏女子

伯姬不見我乃今始七齡家書無虛月豈異常歸寧汝

夫綴卿官汝兒亦搢紳兒已受師學出藍而更青女復
知女功婉孌有典刑自吾捨汝東中父繼在廷小父數
往來吉音汝每聆既嫁遂願懷孰如汝所丁而吾與汝
母湯熨幸小停丘園祿一品吏卒給使令膏粱以晚食
安步而車駟山泉臯壤間適志多所經汝何思而憂書
每說涕零吾廬所封殖歲久愈華菁豈特茂松竹梧楸
亦冥冥芰荷羨花實瀰漫爭溝洫諸孫官來游誰謂川
無舲姑示汝我詩知嘉此林垆未有擬寒山覺汝耳目

熒因之授汝季季也亦淑靈

要望之過我廬

念子且行矣要子過我廬
汲我山下泉煮我園中蔬
知子有仁心不忍釣我魚
我池在人境不與獮獺居
亦復無蟲蛆出沒爭腐餘
食罷往遊觀鱗鱗藻與蒲
清波映白日擺尾揚其鬚
豈魚有此樂而我與子無
擊壤謠聖時自得以為娛

遊土山示蔡天啟秘校

定林瞰土山近乃在眉睫誰謂秦淮廣正可藏一鰲朝
予欲獨往扶僊強登涉蔡侯聞之喜喜色見兩頰呼鞍
追我馬亦以兩黥挾斂書付衣囊裹飯隨藥笈脩脩阿
蘭若土木老山脅鼓鐘卧空曠箕筴雕捷業升堂廓無
主考擊誰敢輒坡陀謝公冢藏椁久穿劫百金買酒地
野老今行饁紉懷起東山勝踐此稠疊於時國累卵楚
夏血常喋外實備難梗中仍費調燮公能覺如夢自喻
一蝴蝶桓溫適自斃苻堅方天厭且可緩九錫寧當快

一捷彼哉斗筭人得喪易矜怯妄言屐齒折吾欲刊史
牒傷心新城埭歸意終難愜漂搖五城舟尚想浮河檝
千秋籠東月長照西州堞豈無華屋處亦捉蒲葵箠碎
金諒可惜零落隨秋葉好事所傳玩空殘法書帖清談
眇不嗣陳迹恍如接東陽故侯孫少小同鼓篋一官初
嶺海仰視飛鳶跼窮歸放歎段高卧停遠蹠牽襟肘即
見著帽耳纔摩數掾危敗屋為我炊陳浥雖無膏汚鼎
尚有羹濡筴縱言及平生相視開笑靨邯鄲枕上事且

飲且田獵或昏眠委翳或妄走超躡或呌號而寤或哭
泣而魘幸哉同聖時田里老安帖易牛以寶劒擊壤勝
彈鋏追憐衰晉末此土方岌業強偷湏臾樂撫事終愁
慄予雖天戮民有械無接摺翁今貧而靜內熱非復葉
予衰極今歲儻與雞夢協委蛻亦何恨吾兒已長鬣翁
雖齒長我未見白可鑷祝翁尚難老生理歸善攝久留
畏年少譏我兩咄囁束火扶路還宵明孤兔懾蔡侯雄
俊士心懔形亦謀異時能飛鞚快若五陵俠胡為阡陌

間踈足僅相躡諒欲交轡語怯子不能嚼

再用前韻寄蔡天啟

蔡侯東方來取友無所挾脩脩一囊衣偶以一書笈定
林朝自炊有匕或無筴時時羹藜藿鏝大苦難變驕頑
遂敢侮有甚觀駢脅澹然山谷中變色未嘗輒始見類
欺魄寒暄粗誚接從容與之語爛漫無不涉奇經可治
疾祕祝可解魔巫醫之所知瞽史之所業載車必百兩
獨以方寸攝微言歸易悟疾若髭赴鑷天機信卓越學

等何足躡縱談及既往每與唐許協揚雄尚漢儒韓愈
真秦俠好大人謂狂知微乃如諜惟知造文字人惑鬼
愁懾秦愚既改臯新眊仍易疊六書遂失指隸草矜敏
捷誰珍檀山刻共賞蘭亭帖東京一祭酒收拾偶予慙
少嘗妄思索老懶因退怯侯方習篆籀寸管靜嘗磨深
原道德意助我耕且獵昔功恐唐捐異味今得饁京口
媚學子追師嘗刼刼陸羸淮汴糧水餽湖海鰥遠求而
近遺如目不見睫偽鳳易悅楚真龍反驚葉聞予再三

歎徃徃心不厭或自逸而走或吐而不嚙或嗤元郎漫
或訛白翁囁嚅鏐金徒欲消韞玉豈愁浥賢愚有定分咄
汝無喋喋跨鞍隨我遊曳屣聯我跼照泉挹清泚跂石
緣嵬嶮東坡數儵魚西崦追蛺蝶翳林窺搏黍藉草聽
批頰黃尋遠蓮鬚紅閱鄰杏靨荏苒光景流揚園忽無
葉扶病歸未久吾見喜寧帖褰裳告我去祿仕當隨牒
蕭晨秣款段歸期得追躡謂言循東路覆出西城堞行
矣忍羈旅無魚勿彈缺天閑久索驥駿足方騰蹠長驅

勿驕矜小疏亦勿慄鵬飛九萬里勿借風一簣溟波浩
難窮勉自養鱗鬣爵祿實天械功名為接摺寧能復與
我搖漾秦淮擬附書勿辭頻隔歲期滿篋

獨歸

鍾山獨歸雨微冥稻畦夾岡半黃青疲農心知水未足
看雲倚木車不停悲哉作勞亦已久暮歌如哭難為聽
而我官閒幸無事北窗枕簟風泠泠於時荷花擁翠蓋
細浪翻雪千娉婷誰能歇眼共此樂秋港雖淺可揚舲

車載板二首

荒哉我中國珍果所不產朝暮惟有鳥自呼車載板楚
人聞此聲莫有笑而莞而我更歌呼與之相往返視遇
若搏黍好音而睨睨壤壤生死夢久知無所揀物弊則
歸土吾歸其不晚歸歟汝隨我可相蒿里挽

鳥有車載板朝暮嘗一至世傳鵬似鴉而此與鴉似唯
能預人死以此有名字疑即賈長沙當時所遭值洛陽
多少年擾擾經世意粗聞方外語便釋形骸累吾衰久

捐書放浪無復事尚自不見我安知汝為異憐汝好毛
羽言音亦清麗胡為太多知不默而見忌楚人既憎汝
彈射將汝利且長隨我遊吾不汝羹齧

謝公墩

走馬白下門投鞭謝公墩昔人不可見故物尚或存問
樵樵不知問牧牧不言摩挲蒼苔石點檢屐齒痕想此
絳長檣想此倚短轅想此玩雲月狼籍盤與蹲井逕亦
已沒漫然禾黍村摧藏羊曇骨放浪李白魂亦已同山

丘緬懷時蘭蓀小草戲陳迹甘棠詠遺恩萬事付鬼錄
耻榮何足論天機自開闔人理孰畔援公色無懼喜儻
知禍福根涕淚對桓伊暮年無乃昏

明妃曲二首

明妃初出漢宮時淚濕春風鬢脚垂低徊顧影無顏色
尚得君王不自持歸來却怪丹青手入眼平生幾曾有
意態由來畫不成當時枉殺毛延壽一去心知更不歸
可憐着盡漢宮衣寄聲欲問塞南事只有年年鴻雁飛

家人萬里傳消息好在羶城莫相憶君不見咫尺長門
閉阿嬌人生失意無南北

明妃初嫁與邊陲羶車百兩皆胡姬含情欲說獨無處
傳與琵琶心自知黃金捍撥春風手彈看飛鴻勸杯酒
漢宮侍女暗垂淚沙上行人却回首漢恩自淺胡自深
人生樂在相知心可憐青塚已蕪沒尚有哀絃留至今

食黍行

周公兄弟相殺戮李斯父子夷三族富貴常多患禍嬰

貧賤亦復難為情身隨衣食南與北至親安能常在側
謂言黍熟同一炊炊見隴上黃離離遊人中道忽不返
從此食黍還心悲

送春

武陵山下朝買船風吹宿霧山花鮮萬家笑語橫青天
綺窗羅幕舞嬋娟小鬟折花叩船舷玉琰寫酒釀金錢
朱覺飛動浮雲歛天外筦簫來宛轉斷橋人行夕陽路
樓觀瑠璃影中見酡顏未分驂騶催燭入坐客猶徘徊

豈知閶闔門邊住春盡不見芳菲開日月紛紛車走坂
少年意氣何由挽洞庭浪與天地白塵昏萬里東浮眼
黑貂裘敝歸幾時相見綠樹啼黃鸝榮華俯仰憂患隨
命駕吾與高人期

酬王伯虎

吾聞人之初好惡尚無朕帝與鑿耳目賢愚遂殊品爾
來百千年轉化薄愈甚父翁相販賣浮詐誰能審睢盱
猴纓冠狼籍鼠穴寢滄海恐值到誰論魚鼈淦鴉聲雖

云惡草去在食甚嗟誰職教化獨使此風稔恬觀不知
救坐費太官廩予生少而戇好古乃天稟念此俗衰壞
何嘗敢安枕有時不能平悲吒失食飲唯子同我病亦
或涕沾衽謂予可告語密以詩來諗爛然辭滿紙秋水
濯新錦窮觀何拳拳靜念復凜凜賤貧欲救世無寧猶
拾瀋說窮且版築尹屈唯烹飪逢時豈遽廢避俗聊湏
噤徂年幸未暮此意可勤恁

送潮州呂使君

韓君揭陽居戚嗟與死鄰呂使揭陽去笑談面生春當
復進趙子詩書相討論不必移鯉魚詭怪以疑民有若
大顛者高材能動人亦勿與為禮聽之汨彞倫同朝叙
朋友異姓接婚姻恩義乃獨厚懷哉余所陳

和吳沖卿雪

陽回力猶遭陰合勢方聳填空忽汗漫造物誰憐憫輕
於擘絮紛細若吹毛翫雲連晝已替風助宵仍洶憑陵
雖一時變態亦千種簾深卷或避戶隘闕猶擁滔天有

金史紀事本末卷十八
凍浪匝地無荒隴飛揚類挾富委翳等辭寵穿幽偶相
重值儉輒孤聳積慘會將舒羣輕那久重紛華始滿眼
消釋不旋踵槁樹散飛花空簷落縣湏還當困炎熱以
此滌煩壅共約市南人收藏不為冗

和沖卿雪詩并示持國

地卷江海浮天吹河漢湧北風散作花巧麗世無種
霾昏得照曜塵滓歸掩擁荒林無空枝幽瓦有高隴
分纔一毛細聚或千鈞重飛颺窺已眩摧壓聽還兇
漁舟平

繫舡樵屨沒歸踵空令物象瑩豈免川塗壅爭光姮娥
妬失色義和恐賴逢陽氣烝轉作水波溶舞庭稱賀嚴
掃路傳呼寵衝遊謝壯少避卧甘閒冗吳侯絕俗唱韓
子當敵勇勝負觀兩豪吾衰但陰拱

北客置酒

紫衣操鼎置客前巾構稻飯隨梁饘引刀取肉割啖客
銀盤擘臠莞與鮮殷勤勸侑邀一飽卷牲歸館觴更傳
山蔬野果雜飴蜜攏脯豕腊加魚煎酒酣衆史稍欲起

小隊捋耳爭留連為君止飲且少安一杯相屬非偶然
奉使道中寄育王山長老常坦

道人少賈海上游海舶破散身沈浮抱金滿篋人所寄
吹簫偶得還中州羸身歸金不受報抵取斗酒相獻酬
歡娛慈母終一世脫棄妻子藏巖幽蒼烟寥寥池水漫
白玉菡萏吹高秋夜燃栢子煮山藥憶此東望無時休
塞垣春拈積雪溜沙磧盛怒黃雲愁五更匹馬隨雁起
想見鄮郭花今稠百年夸奪終一丘世上滿眼真悠悠

寄聲萬里心綢繆莫道異趣無相求

送李屯田守桂陽

泊船香爐峰始與子相識寄書邗江上詒我峰下石緣
以湘水竹攜持與南北永懷故人歡不願百金易竹枯
歸樵蘇石爛棄沙礫夷門得邂逅綠髮皆半白追思少
時事俛仰如一夕老矣無所為空知念疇昔常思一杯
酒要子相解釋出門事紛紛歸卧意還欲聞當上湓水
持詔守嶺阨方為萬里別執手先慘戚茲游信浩蕩山

水多所得為我謝香爐風塵每相憶

送程公闢守洪州

畫船挿幟搖秋光鳴鏡傳鼓水洋洋豫章太守吳郡郎
行指斗牛先過鄉鄉人出郭航酒漿魚鼈膾炙稻粱
芡頭肥大菱腰長醕醕喧呼坐滿床怪君三年滯瞿塘
又驅傳馬登大行纓旄脫盡歸大梁翻然出走天南疆
九江左投貢與章揚瀾吹漂浩無旁老蛟戲水風助狂
盤渦忽圻千丈強君聞此語悲慨慷慨迎吏乃前持一觴

鄱州歷選多僞良鎮撫時有諸侯王拂天高閣朱鳥翔

西山蟠繞鱗鬣蒼下視城塹真金湯雄樓傑屋鬱相望

中戶尚有千金藏漂田種秔出穰穰沉檀珠犀雜萬商

大舟如山起牙樯

一本無此一句

輸漚交廣流荆揚輕裙利屐

列名倡春風蹋謠能斷腸平湖灣塢煙渺茫樹石珍怪

花草香幽處往往聞笙簧地靈人秀古所藏勝兵可使

酒可嘗十州將吏隨低昂談笑指麾回雨暘非君才高

力方剛豈能跨有此一方無為聽客欲霑裳使君謝吏

趣治裝我行樂矣未渠央

東門

東門白下亭摧甍蔓寒葩淺沙棧素舸一水宛秋蛇
漁商數十室門巷隱桑麻翰林謫仙人往歲酒姥家
調笑此水上能歌楊白花楊花飛白雪枝裏綠煙斜
舞袖卷煙雪綺裘明紫霞風流翳蓬顆故地使人嗟
迢迢陌頭青空復可藏鷗

和王微之登高齋三首

寒雲沈屯白日埋河漢蕩圻天如筴衡門兼旬限泥潦
卧聽窾木鳴相換蕭辰忽掃纖翳盡北嶺初出青鬼鬼
微之新詩動我目爛若火齊金盤堆想攜諸彦眺平野
高論歷詆秦以來舫船淋浪始快意忽億歸雲胡為哉
念君少壯輟游衍發揮春秋名玉林書成不得斷國論
但此空語傳八垓登臨興罷因感觸更欲遠引追宗雷
君知富貴亦何有謫譽未足償譏排風豪雨橫費調燮
坐使髮背為黃台留賓往往夜參半雖有罇俎無由開

江南佳麗非一日况乃故園名池臺能招過客飲文字
山水又足供歡咍剩留官屋貯酒母取醉不竭當如淮
六朝人物隨烟埃金輿玉几安在哉鍾山石城已寂寞
祇見江水雲端來百年故老有存者尚憶世宗初伐淮
魏王兵馬接踵出旗纛千里相搪挨當時謀臣非不衆
上國拔取多陪臺龍騰九天跨四海一水欲阻為可咍
降王北歸樓殿圻棄屋尚鎖殘金堆神靈變化自直主
將帥何力求公台山川清明草木靜天地不復屯雲雷

使君登高訪古昔傷此陳迹聊持杯因留嘉客坐披寫
鄙渌笑語傾如篴酒酣重惜功業晚老矣萬卷徒兼該
攢峰列壑動歸興憂端落筆何崔嵬餘年無歡易感激
亦愧莊叟能安排青燈明滅照不寐但把君詩闔且開
干戈六代戰血埋雙闕尚指山崔嵬當時君臣但兒戲
把酒空勸長星杯臨春美女閉黃壤玉技自一作榮繁
如堆後庭新聲散樵牧興廢倏忽何其哀咸陽龍移九
州圯遺種變化呼風雷蕭條中原碣無水崛起又此憑

江淮廣陵衣冠掃地去穿築隴畝為池臺吳儂傾家助
紅始尺土不借秦人徒珠犀磊落萬艘入金壁照耀千
門開建隆天飛跨兩海南發交廣東溫台中間業業地
無幾欲久割據誠難哉靈旗指麾盡貔虎談笑力可南
山排樓船蔽川莫敢動扶伏但有謀臣來百年滄洲自
潮汐事往不與波爭迴黃雲荒城失苑路白草廢時空
壇垓使君新篇韻險絕登眺感悼隨嘲吟嗟予愁憊氣
已竭對壘每欲相劇揆揮毫更想能一戰數窘乃見詩

人才

書任村馬鋪

兒童繫馬黃河曲近岸河流如可掬
任村炊米朝食魚日暮滎陽驛中宿
投老經過身獨在當時洲渚今平陸
林黍冥冥十數家仰視荒蹊但喬木
冰盤羹羹客自知起看白水還東馳
爾來百口皆年少歸與何人共此悲

葛蘊作巫山高愛其飄逸因亦作一篇

巫山高偃薄江水之滔滔水於天下實至險山亦起伏

為波濤其巔冥冥不可見
嵯岸斗絕悲猿猱赤楓青櫟
生滿谷山鬼白日樵人遭窈窕
陽臺彼神女朝朝暮暮
能雲雨以雲為衣月為褚
乘光服暗無留阻崑崙曾城
道可取方丈蓬萊多伴侶
塊獨守此嗟何求況乃低徊
夢中語

和王勝之雪霽借馬入省

泥水填馬不受轍瓦雪得火猶藏溝宿霧紛紛度城闕
朔氣凜凜吹衣裘窮閭閉門無一客剝啄驚我有前騶

強隨傳呼出屋去鼻息凍合髭繆繆投韁馬鬣任歌側
欲出操筆手還抽行思江南悲故事溪谷冬暖花常流
前年臘歸三見白霽色嶺上班班留枝藜此時將邑子
登眺置酒身優游豈如都城今日事抵恐一蹶為親憂
因知田里駕疑段昔人豈即非良謀君家洛陽名實大
談笑拈槁回春柔平生意氣故應在白髮未敢相尋求
從容退食想佳節豈無歌聲相獻酬奈何亦作苦寒調
歎息朝夕無驂騑超然遂有江湖意滿紙為我書窮愁

相如正應居客右子路且莫乘桴浮

和吳沖卿鵷鳴樹石屏

寒林昏鵷相與還下有跂石蒼孱顏曾於古圖見髣髴
已怪刀筆非人間君家石屏誰為寫古圖所傳無似者
鵷飛歷亂止且鳴林葉慘慘風烟生高齋日午坐中見
意似落日空上行君詩雄盛付君手云此非人乃天巧
嗟哉渾沌死乾坤至造作萬物醜妍巨細各有理問此
誰主何其精恢奇譎詭多可喜人於其間乃復雕鐫刻

畫出智力欲與造化追相傾拙者婆婆尚欲奮工者固
已窮夸矜吾觀鬼神獨與人意異雖有至巧無所爭所
以號山間埋沒此寶千萬歲不為見者驚吾又以此知
妙偉之作不在百世後造始乃與元氣并畫工粉墨非
不好歲久剝爛空留名能從太古到今日獨此不朽由
天成世人尚奇輕貨力山珍海怪採掇今欲索此屏後
出為君得胡賈欲價著不識吾知金帛不足論當與君
詩兩相直

送李宣叔倅漳州

關山到漳窮地與南越錯山川鬱霧毒瘴癘春冬作荒
茅篁竹間蔽虧有城郭居人特鮮少市井宜蕭索野花
開無時蠻酒持可酌窮年不用客誰與分杯杓朝廷尚
賢俊磊砢充臺閣君能喜節行文勢又該博超然萬里
去識者為不樂予聞君子居自可救民瘼苟能禦外物
得地無美惡似聞最南方北客今勿藥林麓換風氣獸
蛇凋毒蠱如漳猶近州氣冷又銷鑠珍足海物味其厚

不為薄章舉馬甲柱固已輕羊酪蕉黃荔子丹又勝楂
梨酢逢衣比多士往往在丘壑從容與笑語豈不慰寂
寞太守好觴詠嘉賓應在幕想即有新詩流傳至京洛

韓持國從富并州辟

韓侯永玉人不可塵土襍官雖衆俊後名字久訇磕并
州天下望撫士威愛懷千金棄不惜賓客常滿閭遙聞
餘風高為子置一榻親交西門餞百馬驕襍選子材宜
用世談者為鳴喑矧今名主人氣力足可欲推賢為時

輔勢若朽易拉會當薦還朝立子在閭闔惜哉秣騏驎
賦以升侑合洛予栖栖者氣象已摧塌他年佐方州說
將尚不納況於聲勢尊豈易取酬答有如持寸莛未足
感韞韞顧於山水間意願多所合匡廬與韶石少小已
嘗蹋風遊會稽春雲宿天柱臘淮湖江海上慣食蝦蟹
蛤西南窮岷嶓東北盡濟漯身雖未嘗歷魂夢已稠沓
荆溪最所愛映燭多廟塔溪果點丹漆溪花團繡罽扁
舟信所過行不廢搏搯一從捨之去霜雪行滿領思之

不能寐。魔若蚺。嚙方將築其濱。畢景謝。嚙嚙安能孤。
此意顛倒就衰颯。唯予余所嚮。嗜好比鵜鰈。何時歸相
過。遊履尚可蠟。

寄王逢原

北風吹雲埋九垓。草木零落空池臺。六龍避逃不敢出。
地上獨有寒崔嵬。披衣起行愁不愜。歸坐把卷闔且開。
永懷古人今已矣。感此近世何為哉。申韓百家爇火起。
孔子大道寒於灰。儒衣紛紛欲滿地。無復風焰空煤炰。

力排異端誰助我憶見夫子真奇材梗柙豫章槩白日
祇要匠石聊穿裁我方官拘不得往子有閒暇宜能來
晤言相與入聖處一取萬古光芒迴

送裴如晦即席分題

以黠然消魂惟別而
已為韻擬而字韻作

十月歎水冰問君行為行不顧斗米自與五湖期平
生湖上遊幽事畧能知此後君最樂窮年得游嬉彩鯨
抗波濤風作鱗之而鳴鼓上洞庭笑看紅橘垂漠漠大
梁下黃沙吹酒旗應憐故人愁回首一相思

吳長文新得顏公壞碑

魯公之書既絕倫歲久更為時所珍
荒壇壞冢朽崖屋剝落風雨埋煨塵
斷碑數尺誰所得點畫八紙完如新
延陵公子好事者拓取持寄情相親
六書篆籀數變改訓詁後世多失真
誰初妄鑿妍與醜坐使學士勞骸筋
堂堂魯公勇且仁出遇世難親經綸
揮毫卓犖又驚俗豈亦以此誇常民
但疑技巧有天得不必勉強方通神
詩歌甘棠美召伯愛惜蔽芾由思人
時危忠誼常恨少

寶此勿復令埋埋

悼四明杜醇

杜生四五十孝友稱鄉里隱約不外求耕桑有妻子藜
杖牧雞豚筠筒釣魴鯉歲時沽酒歸亦不乏甘旨天涯
一杯飯夙相逢喜談辭足詩書篇詠又清泚都城問
越客安否常在耳日月未渠央如何棄予死古風久凋
零好學少為已悲哉四明山此士今已矣

哭梅聖俞

詩行於世先春秋國風變衰始栢舟文辭感激多所憂
律呂尚可諧鳴球先王澤竭士已偷紛紛作者始可羞
其聲與節急以浮真人當天施再流篤生梅公應時求
頌歌文武功業優經奇緯麗散九州衆皆少銳老則不
翁獨辛苦不能休惜無采者人名邁貴人憐公青兩眸
吹噓可使高岑樓坐令隱約不見收空能乞錢助饋餉
疑此有物司諸幽棲棲孔孟葬魯鄒後始卓犖稱軻丘
聖賢與命相楯矛勢欲強達誠無由詩人况又多窮愁

李杜亦不為公侯公窺窮阨以身投坎珂坐老當誰尤
吁嗟宜即非善謀虎豹雖死皮終留飄然載喪下陰溝
粉書軸幅懸無旒高堂萬里哀白頭東望使我商聲謳

別孫莘老

逢原未熟我已與子相知自吾得逢原知子更不疑把
手湖上舟望子欲歸時茫然乃分散獨背東南馳寥寥
西城居邂逅與子期雞鳴入省門朱墨來紛披含意不
自得強顏聊爾為會合常在夜青燈照書詩往往並衾

語至明不言疲忽忽捨我去使我當從誰送子不出門
我身方羈縻我心得自如今與子相隨隨子在湖上逢
原所嘗嬉想見荷葉盡北風卷寒漪已懷今日愁更念
昔日悲相逢亦何有但有鏡中絲

示平甫弟

汴渠西受崑崙水五月奔湍射黃矢高淮夜八忽倒流
碕岸相看欲生紫萬檣如山屹不動嗟我仲子行亦止
自聞留連且一月每得問訊猶千里老工取河天上落

伏礫澶沙卷無底土橋立馬望城東數日知有相逢喜
牆隅返照媚槐榭池面過雨蘓篁葦欣然把手相與閒
所願此時無一詭豈無他憂能老我付與天地從今始
閉門為謝載酒人外慕紛紛吾已矣

送董伯懿歸吉州

我來以喪歸君至因謫徙蒼黃憂患中邂逅過於此去
年服初除聽敕相助喜看君數歸月但屈兩三指茫然
冬更秋一笑非願始籃輿楊柳下明月芙蓉水僮飢屢

闕門客罷方隱几是非評衆詩成敗斷前史時時對奕
石漫浪爭生死送迎皆幅巾設席但陳米亦曾戲篇章
揮翰疾蒿矢君豪才有餘我老憊先止東城景陽陌南
望長干紫欲斲三畝蔬於焉寄殘齒經過許後日唱和
猶在耳新恩忽捨我欣悵生彼已江湖北風帆捩柂即
千里相逢知何時莫惜縑與紙

明州錢君倚衆樂亭

使君幕府開東部名高海曲人和慕
艤船談笑政即成

洗滌山川作嘉趣平泉浩蕩銀河注想見明星弄機杼
載沙築成天上路投虹為橋取孤嶼掃除荊棘水中央
碧瓦朱甍隨指顧春風滿城金版舫來看置酒新亭上
百女吹笙綵鳳悲一夫伐鼓靈囂壯安期羨門相與遊
方丈蓬萊不更求酒酣忽跨鯨魚去陳迹空令此地留

和平甫舟中望九華山二首

楚越千萬山雄奇此山兼盤根雖巨壯其末乃脩纖去
縣尚百里側身勇前瞻蕭條煙嵐上縹緲浮青尖徐行

稍復逼所矚亦已添精神去疊疊氣象來漸漸卸席取
近岸移船傍蒼兼窺觀坐窮晡未覺晷刻淹江空萬物
息四面波瀾恬我然九女鬟爭出一鏡奩卧送秋月沒
起看朝陽暹游氛蕩無餘瑣細得盡覘陵空翠纛直照
影寒鉉鈿冢木立紺髮崖林張紫髯變態生倏忽雖神
詎能占當留老吾身少駐誰云饜惜哉秦漢君黃屋上
衡濤等之事嬉遊捨此何其廉我疑二后荒神物久已
厭埋藏在雲霧不欲登昏憒又疑避褒封蔽匿以為謙

或是古史書脫落簡與籤當時備巡遊今不在絀縑終
南秦之望泰山魯所瞻天王與秩祭俎豆羅醢鹽苟能
澤下民維此遠亦沾方今東南旱土脉燥不黏尚無膚
寸功豈免竊食嫌神莽吾難知士病吾能砭文章巧傳
會智術工飛箝薦寶互珪璧論材自梗柟苟以飾婦妾
謬云活蒼黔豈如幽人樂茲山謝閭閻穴石作戶牖垂
泉當門簾尋奇出後徑覽勝倚前簷超然往不返舉世
徒沾沾高興寄日月千秋伴烏蟾遐追商洛翁秦火不

能炎近慕楚穆生竟脫楚人鉗吾意竊所尚人謀諒難
僉

誰謂九華遠吾身未嘗瞻唱篇每起予予口安能拈憶
在秋浦北空江上新蟾光潔寫一鏡迴環兩堤奩露坐
引衣襟風行歆帽簷維舟當此時巨細得盡瞻試嘗論
大略次乃述微纖此山廣以深包畜萬物兼噓雲吐霧
雨生育靡不漸巍然如九皇德澤四海沾此山相後先
各出羣峰尖毅然如九官羅立在堂廉挺身百辟上附

麗無姦儉此山高且寒五月不覺炎草樹萋已綠氷霜
尚涵淹頽然如九老白髮連蒼髯此山當無雲秀色鬱
以添婉然如九女靚飾出重簾珮環與巾裙紺玉青紈
縑遠之妍西施近或醜無鹽變態不可窮詩者徒咕咕
我初勇一往役世難安恬浪荒不走職民瘼當誰砭垂
離今數旬夢想欲窺覘自期得所如何啻釋囚鉗念昔
太白巔下視海日暹竭來天柱遊屐齒尚苔黏猶之健
飲食屢饗亦云饜胡為慕攀踏已憊且不嫌豈其仁智

心山水固所潛男兒有所學進退不在占功名苟不諧
廊廟等閭閻况乃掄椽杙其誰辨梗枲歸歟巖崖居料
理帶與籤得石坐兀兀逢泉飲厭厭取舍斷在獨豈必
詢謀僉子語實慰我寧殊邑中黔玉枝將在山當倚以
葭蒹詩力我已屈鋒鏑子猶銛扶復更一戰語汝其無
謙

和中甫兄春日有感

雪釋沙輕馬蹄疾北城可遊今暇日濺濺溪谷水亂流

漠漠郊原草爭出嬌梅過雨吹爛漫幽鳥迎陽語啾唧
分香欲滿錦樹園剪綵休開寶刀室胡為我輩坐自苦
不念茲時去如失飽聞高逕動車輪甘卧空堂守經帙
淮蝗蔽天農久餓越卒圍城盜少逸至尊深拱罷簫韶
元老相看進刀筆春風生物尚有意壯士憂民豈無術
不成歡醉但悲歌回首功名古難必

寄曾子固

吾少莫與合愛我君為最君名高山嶽嶸高與太低

心收養友似不讓塵壒又如滄江水不逆溝畎澮君身
揭日月遇輒破氛靄我材特窮空無用補倉廩謂宜從
君久垢污得淘汰人生不可必所願每顛沛垂離五年
餘牢落千里外投身落俗甯薄宦自鉗鉢平居每自守
高論從誰丐搖搖西南心夢想與君會思君挾竒璞願
售無良儻窮閭抱幽憂凶禍費襁褓州窮吉士少誰可
壻諸妹仍聞病連月醫藥誰可賴家貧奉養狹誰與通
貨貝詩人刺曹公賢者荷戈投奈何遭平時德澤盛汪

滅鸞鳳鳴且下萬羽來翩翩呦呦林間鹿爭出噬苹蕚
乃令高世士動輒遭狼狽人事既難了天理尤茫昧聖
賢多如此自古云無奈周人貴婦女扁鵲名醫滯今世
無常勢趨舍唯利害而君信斯道不閔身窮泰弃捐人
間樂濯耳受天籟諒知安肥甘未肯顧糠粃龍螭雖蟠
屈不慕蛇蟬蛻令人重感奮意勇忘身最何由日親炙
病體同砭艾功名未云合歲月尤須惕懷思切劇効中
夜淚霑霑君常許過我早晚治車軼山溪雖峻惡高眺

發蒙肺峰巒碧參差木樹青庵藹桐江路尤駛飛檣下
鳴瀨魚村指暮火酒舍瞻晨旆清醪足消憂玉鯽行可
膾行行願無留日夕佇傾蓋會將見顏色不復謀著蔡
延陵古君子議樂耻言鄒細事豈足論故欲論其大披
披發鞬橐懔懔見戈銳探深犯嚴壁破惑翻強檣離行
步荃蘭偶坐陰松檜宵牀連衾幘晝食共麤糲茲歡何
時合清瘦見衣帶作詩寄微誠誠語無綵繪

有感

憶昔與胡子戲娛西城幽放斥僕與馬獨身步田疇牛
豎歌我旁聽之為久留一接田父語嘆之勝王侯追逐
恨不恣暮歸輒懷愁顧常輕千乘祇願足一丘子時怪
我少好此寂寞遊笙篴不入耳又不甘醪羞那知抱孤
傷罷頓不能適世味已鮮少但餘野心稠乖離今十年
班髮滿我頭昔興亦略盡食眠常百憂每逢佳山水欲
往輒復休方壯遂如此況乃高春秋

白紵山

白紵象山頂江湖所縈帶浮雲卷晴明可見九州外肩
輿上寒空置酒故人會峰戀帳錦繡草木吹竽籟登臨
信地險俯仰知天大留歡薄日晚起視飛鳥背殘年苦
局東往事嗟摧壞歌舞不可求桓公井空在

九井

得盈字

沿崖涉澗三十里高下犖确無人耕捫蘿挽蒿到山趾
仰見吹瀉何崢嶸餘聲投林欲風雨末勢卷土猶溪阮
飛蟲凌兢走獸慄霜雪夏落雷冬鳴野人往往見神物

鱗甲漠漠雲隨行我來立久無所得空數石上菖蒲生
中官繫龍沉玉冊小吏礫狗澆銀觥地形偶爾藏險怪
天意未必司陰晴山川在理有崩竭丘壑自古相虛盈
誰能保此千世後天柱不折泉常傾

書會別亭

西城路居人送客西歸處年年借問去何時今日扁舟
從此去春風吹花落高枝飛來飛去不自知路上行人
亦如此應有重來此處時

張氏靜居院

動者利進為靜者樂止居物性有偏得惟賢時卷舒張
侯始出仕所至多名譽老矣歸偃休買地剏荒蕪屋成
為令名名實與時俱南堂棲幽直晨起瞻像圖北堂畫
五禽游戲養形軀燕有諸賓庭學有諸子廬問侯年幾
何矯矯八十餘問侯何能爾心不藏憂愉問侯客何為
弦歌飲投壺問侯免何讀夏商及唐虞嵩山填門戶洛
水遶階除疾於山水間結駟有通衢我念老退者古多

賢大夫留侯亦養生乃欲凌空虛閉門不飲酒豈異山
中臞疎傳稍喜客揮金能自娛不聞喜教子滿屋青紫
朱張侯能兼取勝事古所無褒稱有樂石丞相為之書
而我不自量聞風亦歌呼

禿山

吏役滄海上瞻山一停舟怪此禿誰使鄉人語其由一
狙山上鳴一狙從之遊相匹乃生子子衆孫還稠山中
草木盛根實始易求攀挽上極高屈指亦窮幽衆狙各

豐肥山乃盡侵牟攘爭取一飽豈暇議藏收大狙尚自
若小狙亦已愁稍稍受咋嚙一毛不得留狙雖巧過人
不善操耒耨所嗜在果穀得之常以偷嗟此海山中四
顧無所投生生未云已歲晚將安謀

杭州修廣師法喜堂

浮屠之法與世殊洗滌萬事求空虛師心以此不挂物
一堂收身自有餘堂陰置石雙嵴嶠石脚立竹青扶疎
一來已覺肝膽豁况乃宴坐窮朝晡憶初救時勇自許

壯夫看俗尤崎嶇豐車肥馬載豪傑少得志願多憂虞
始知進退各有理造次未可分賢愚會將築室返耕釣
相與此處吟山湖

復至曹娥堰寄剡縣丁元珍

溪水渾渾來自北千山抱水清相射山深水急無艇子
欲從故人安可得故人昔日此水上蹲酒扁舟慰行役
津亭把手坐一笑我喜滿懷君動色論新講舊惜未足
落日低徊已催客離心自醉不復飲秋果寒花空滿席

今年却坐相逢處
悵難求別時迹
可憐溪水自南流
安得溪船問消息

寄贈胡先生

并序

孔孟去世遠矣
信其聖且賢者
質諸書焉耳翼之
生與予並世
非若孔孟之遠也
聞薦紳先生所稱述
又詳於書
不待見而後知
其人也
歎慕之不足
故作
是詩

先生天下豪傑魁
胃臆廣博天所開
文章事業望孔孟

不復睥睨蔡興崔十年留滯東南州飽足藜藿安蒿萊
獨鳴道德驚此民民之聞者源源來高冠大帶滿門下
奮如百蟄乘春雷惡人沮服善者起昔時蹻跼今騫回
先生不試乃能爾誠令得志如何哉吾願聖帝營太平
補葺廊廟枝傾頽披旒發續廣耳目照徹山谷多遺材
先收先生作梁柱以次構架楠與榱羣臣面向帝深拱
仰戴堂陛方崔嵬

得曾子固書因寄

始吾居揚日重問每見及云將自親側萬里同講習子
行何舒舒吾望已汲汲窮年夢東南顏色不可挹仁賢
豈欺我正恐事維繫嚴親抱憂衰生理賴以給不然航
江外天寒北風急無乃山路惡僕弱馬行澁孤懷未肯
開歲物忽如蟄竭來高郵住巷屋頗卑濕蓬蒿稍芟除
茅竹隨補葺苟云禦風氣尚恐憂雨汁故人莫在眼屢
獨開巾笈忠信蓋未見吾敢誣茲邑出關誰與語念子
百憂集眺聽聊自放日暮城頭立徐歸坐當戶使者操

金匱先生集卷十八
書入時開識子意如渴得美湑驪駒日就道玉手行可
執舊學待鐫磨新文得刪拾重登城頭望喜氣滿原隰
憶昨詩示諸外弟

憶昨此地相逢時春入窮谷多芳菲短垣困困冠翠嶺
躑躅萬樹紅相圍幽花媚草錯雜出黃蜂白蝶參差飛
此時少壯自負恃意氣與日爭光輝乘閒弄筆戲春色
脫畧不省旁人譏坐欲持此博軒冕肯言孔孟猶寒飢
丙子從親走京國浮塵坌並緇人衣明年親作建昌吏

四月挽船江上磯，端居感慨忽自寤。青天閃爍無停暉，男兒少壯不樹立，挾此窮老將安歸。吟哦圖書謝慶吊，坐室寂寞生伊威。材疎命賤不自揣，欲與稷契遐相希。旻天一朝畀以禍，先子泯沒予誰依。精神汙離肝肺絕，背血被面無時晞。母兄呱呱泣相守，三載厭食鍾山薇。屬聞降詔起羣彥，遂自下國趨王畿。刻章琢句獻天子，釣取薄祿歡庭闈。身著青衫手持版，奔走卒歲官淮沂。淮沂無山四封瘁，獨有廟塔尤我巍。時時憑高一悵望，

想見江南多翠微，歸心動蕩不可抑。
霍若猛吹翻旌旗，騰書漕府私自列。
仁者惻隱從其祈，暮春三月亂江水。
勁櫓健帆如轉機，還家上堂拜祖母。
奉手出涕縱橫揮，出門信馬向何許。
城郭宛然相識稀，永懷前事不自適。
却指舅館排山扉，當時髻兒戲我側。
于今冠佩何頑頑，况復丘樊滿秋色。
蜂蝶摧藏花草腓，令人感嗟千萬緒。
不忍倉卒回驂駢，留當開樽強自慰。
邀子劇飲母子違。

東臯

起伏晴雲徑縱橫暖水陂草長流翠碧花遠沒黃鸝楚
製從人笑吳吟得自怡東臯興不淺游走及芳時

歲晚

月映林塘澹風含笑語涼俯窺憐淨綠小立佇幽香攜
幼尋新葯扶衰坐野航延緣久未已歲晚惜流光

半山春晚即事

春風取花去酬我以清陰翳翳陂路靜交交園屋深狀
敷每小息杖屨或幽尋惟有北山鳥經過遺好音

歌眠

翠幙卷東岡歌眠月半牀松聲悲永夜荷氣馥初涼清
話非無寄幽期故不忘扁舟亦在眼終日懶衣裳

定林

漱甘涼病齒坐曠息煩襟因脫水邊屨就敷巖上衾但
留雲對宿仍值月相尋真樂非無寄悲蟲亦好音

送張宣義之官越幕

會稽遊宦鄉海物錯句章土潤箭萌羨水甘茶串香今

君誠暫屈他日恐難忘唯有西興渡靈胥或怒張



宋詩鈔卷十八

欽定四庫全書

集部
宋詩鈔卷十九

詳校官中書臣賈鏊

主事銜臣徐以坤覆勘

總校官編修臣王燕緒

校對官中書臣劉源溥

謄錄監生臣鄭家屏

欽定四庫全書

宋詩鈔卷十九

內閣中書舍人吳之振編

王安石臨川詩鈔下

送鄧監簿南歸

不見驪塘路
茫然四十春
長為異鄉客
每憶故時人
水
閱公三世雲
浮我一身濠
梁送歸處
握手但悲辛

即事

徑暖草如積山晴花更繁縱橫一川水高下數家村靜
憇雞鳴午荒尋犬吠昏歸來向人說疑是武陵源

示耿天隲

挾策能傷性捐書可盡年弦歌無舊習香火有新緣白
土長岡路朱湖小洞天望公時顧我於此暢幽悁

北山暮歸示道人

千山復萬山行路有無間花發蜂遞繞果垂猿對攀獨
尋寒水度欲趁夕陽還天黑月未上兒童初掩關

烏塘

地僻居人少山稠伏獸多
怒狸朝博雁曉虎夜窺
騾籬落生孫竹門庭上
女蘿未應悲寂寞六載
一經過

欲歸

水漾青天暖沙吹白日陰
塞垣春錯莫行路老侵
尋綠稍還幽草紅應動
故林留連一杯酒滿眼
欲歸心

壬辰寒食

客思似楊柳春風千萬條
更傾寒食淚欲漲冶城
潮巾

髮雪爭出鏡顏朱
早彫未知軒冕樂
但欲老漁樵

宿雨

綠攪寒蕪出紅爭
暖樹歸魚吹塘水
動雁拂塞垣飛宿
雨驚沙盡晴雲晝
漏稀却愁春夢短
燈火著征衣

題友人郊居水軒

田中三畝宅水上
一軒開為有漁樵
樂非無仕進媒
槎頭收晚釣荷葉
卷新醅坐說魚腴
美功名挽不來

江亭晚眺

日下崦嵫外秋生沆碣間清江無限好白鳥不勝閒
雨過雲收嶺天空月上灣歸鞍侵調角回首六朝山

自白上村入北寺二首

木杪田家出城陰野逕分溜渠行碧玉畦稼卧黃雲薄
槿胭脂染深荷水麝焚夕陽人不見雞鷺自成羣

雨過百泉出秋聲連衆山獨尋飛鳥外時渡亂流間坐
石偶成歇看雲相與還會須營一畝長此聽潺湲

題朱郎中白都莊

蕭灑桐廬守滄洲寄一廬山光隔釣岸江氣雜炊煙藜
杖聽鳴鱗籃輿看種田明時須共理此興在他年

次韻冲卿過睢陽

宮廟此神鄉留親泊楚艘天開今壯麗地積古悲涼不
改山河舊猶餘草木荒還聞足賓客誰是漢鄒陽

崑山慧聚寺次張祐韻

峰嶺互出沒江湖相吐吞園林浮海角臺殿擁山根百
里見漁艇萬家藏水村地偏來客少幽興祇桑門

吳江

莽莽昔登臨秋風一散襟
地留孤嶼小天入五湖深
柑橘無千里魚鰕有萬金
吾雖輕范蠡終欲此幽尋

世事

世事一何稠論心日已偷
尚蒙今士笑宜見古人羞
老圃聊須問良田亦欲求
非關畏黻冕無責易身修

寄上甫

塞上無花草飄風急我歸
稍林聽澗落卷土看雲飛
想

子當紅藥思家上翠微
江寒亦未已好好着春衣

招丁元珍

默默不自得紛紛何所為
畫墁聊取食獵較且隨時
秋入江湖暗風生草樹悲
黃花一杯酒思與故人持

江上二首

潮連風浩蕩沙引客淹留
落日更清坐空江無近舟
共看蒹葭宅聊即稻粱謀
未敢嗟艱食凶年半九州

書自江邊使鄉隣病餓稠
何言萬里客更作百身憂
補

敗今誰卹趨生我自羞西南雙病眼落日倚扁舟

暮春

春期行晚晚春意賸芳菲曲水應修禊披香未試衣雨
花紅半墮烟樹碧相依悵望夢中地王孫底不歸

送鄆州知府宋諫議

盛世千齡合宗工四海瞻天心初籲俊雲翼首離潛德
望完圭角儀形壯陞廉徐鳴蒼玉佩盡校碧牙籤綸掖
清光注鑒坡茂渥霑文明誠得主政瘼尚煩砭右府參

機務東塗贊景炎廟謨資石畫兵畧倚珠鈴坐鎮均勞
逸齋居養智恬謳謠喧井邑惠化穆蒼黔進律朝章擢
疏恩物議僉通班三殿遽徙部十城兼申甫周之翰龜
蒙魯所詹地靈奎宿照野沃汶河漸首路龍旗盛提封
虎節嚴賜衣纓紫艾衛甲綴朱綬海谷移文省谿堂燕
豆添班春回紺幘問俗卷彤襜舟楫商巖命熊羆渭水
占治裝行入覲金鼎重調鹽

歲晚懷古

先生歲晚事田園魯叟遺書廢討論
問訊桑麻憐已長
按行松菊喜猶存
農人調笑追尋壑
稚子歡呼出候門
遙謝載醪祛惑者
吾今欲辨已忘言

段氏園亭

歌眠隨水轉東垣
一點炊煙映水昏
漫漫芙蓉難覓路
脩脩楊柳獨知門
青山呈露新如染
白鳥嬉游靜不煩
朱雀航邊今有此
可能搖蕩武陵源

次韻致遠木人洲

迷子山前漲一洲
木人圖志失編收
年多但有柳生肘
地僻獨無茅蓋頭
河側鮑生乾尚立
江邊屈子槁將投
未妨他日稱居士
能使君疑福可求

次韻酬龔深甫

握手東岡雪滿簷
後期惆悵老吳蠶
芳辰一笑真難值
暮齒相思豈久堪
他日杜詩傳渭北
幾時周宅對漳南
百年邂逅能多少
且可勤來共草菴

次韻酬朱昌叔三首

點也自殊由與求既成春服更何憂拙於人合且天合
靜與道謀非食謀未愛京師傳谷口但知鄉里勝壺頭
嗟予老矣無一事復得此君相與游

去年音問隔淮州百謫難知亦我憂前日杯盤共江渚
一歡相屬豈人謀山蟠直瀆輸淮口水抱長干轉石頭
乘興舟與無不可春風從此與公遊

烏榜登臨興未休共言何許更消憂聯裾蕭寺尋真覺
方駕孫陵弔仲謀語罷每開歡笑口詩來仍掉苦吟頭

已知軒冕真吾累且可追隨馬少游

次韻送程給事知越州

千騎東方占上頭如何誤到北山遊
清明若覩蘭亭月暖熱因忘蕙帳秋
投老始知歡可惜通宵豫以別為憂
西歸定有詩千首想宜重來賁一丘

次韻酬徐仲元

投老逍遙此興堂天刑真已脫桁楊
緣源靜翳無魚淦度谷深追有鳥顏
每苦交遊尋五柳最嫌尸祝擾庚桑

相看不厭唯夫子風味真如顧建康

送程公闢得謝歸姑蘇

東歸行路歎賢哉碧落新除寵上才
白傅林塘傳畫去吳王花鳥入詩來
唱酬自有微之在談笑應容逸少陪
少保元絳謝事居姑蘇又王中甫善歌詞與相唱酬燕集
除此兩翁相見外不知三
逕為誰開

登寶公塔

倦童疲馬放松門自把長筇倚石根
江月轉空為白晝

嶺雲分暝與黃昏鼠搖空寂聲隨起鴟矯荒寒影對翻
當此不知誰客主道人忘我我忘言

重登寶公塔復用前韻

空見方墳涌半霄難將生死問參寥應身東返知何國
瑞像西歸自本朝遺寺有門非輦路故池無鉢但僧瓢
獨龍下視皆陳迹追數齊梁亦未遙

紙暖閣

聯屏蓋障一尋方南設釣簾北置牀側座對敷紅絮暖

仰牕分啟碧紗涼
氈廬易以梅烝壞
錦幄終於草野坊
楚穀越藤真自稱
每糊因得減書囊

小姑

小姑未嫁與蘭支
何恨流傳樂府詩
初學水仙騎赤鯉
竟尋山鬼從文狸
繽紛雲襪空崇檝
綽約烟鬟獨挂旗
弄玉有祠終或往
飛瓊無夢故難知

呈陳和叔

并序

嘉祐末和叔以集賢校理判登聞鼓院同知太常禮

院皮場街有園數畝中置二椽執事丈北戶臨溝略
約通街旁作小屋毀輜車為葢某以直集賢院為三
司度支判官以知制誥糾察在京刑獄同管勾三班
院間度約飯車葢下隨所有無坐卧輒上笑語常至
夜如此三歲而和叔遭太夫人憂未幾某亦喪親以
去時闕永昭陵尚未復土也後與和叔皆蒙今上拔
用數會議語皆憂傷之餘責厚事叢無復故情元豐
元年某食觀使祿居鍾山南和叔經略廣東道舊帳

然某作詩以叙其事

毀車為屋僅容身三歲相要薄主人晝寓樽輒常至夜
冬泂溝約復尋春南陔不洎公歸里蒼墓垂成我喪親
後會縱多無此樂山林投老一傷神

全叔張公有詩在北山西庵僧者墁之悵然有感
十年怊悵躡山阡終欲持杯滴到泉東路角巾非故約
西州華屋漫修椽幽明永隔休炊黍真俗相妨久絕弦
遺墨每看疑邂逅復隨人事散如烟

讀眉山集次韻雪詩二首

若木昏昏未有鷗
凍雷深閉阿香車
搏雲忽散筵為屑
翦水如分綴作花
擁帚尚憐南北巷
持杯能喜兩三家
戲按弄掬輸兒女
羔袖龍鍾手獨叉

戲搖微縞女鬟鵷
試咀流酥已頰車
歷亂稍埋冰揉粟
消沉時點水圓花
豈能舴舺真尋我
且與蝸牛獨卧家
欲挑青腰還不敢
直須詩膽付劉叉

次韻奉和蔡樞密南京種山藥法

蔡詩并序云蒙
見索南都種山

藥法并以生頭數十莖送上輒成小詩青青正是中

分天區種何妨試玉延即見引須緣夏木定知如鑑

薦冬筵

俗傳

即時

以足

潤還

御水

水霜

結落

近

堯雲雨露偏自裹自題還自媿握苗應笑宋人然

區種拋來六七年春風條蔓想宛延難追老圃莓苔徑

空對珍盤玳瑁筵嘉種忽傳河右壤靈苗更長闕西偏

故畦穿斲知何日南望鍾山一慨然

上已聞苑中樂聲書事

苑中誰得從春游想見漸臺瓦欲流御水曲隨花影轉
宮雲低繞樂聲留年華未破清明節日暮初回校楔舟

更覺至尊思慮遠不應全為拙倡優

用樂道舍人韻書十日事呈樂道舍人聖從待制
東門人物亂如麻想見新羈照路華午鼓已傳三刻漏
從官初賜一杯茶忽忽殿下催分首擾擾官前聽賣花
歸去莫言天上事但知呼客飲流霞

詳定試卷

童子常誇作賦工暮年羞悔有揚雄當時賜帛倡優等
今日論才將相中細甚客卿因筆墨卑於爾雅注魚蟲

漢家故事真當改新詠知君勝弱翁

奉酬楊樂道

邂逅聯裾殿閣春却愁容易即離羣相知不必因相識
所得如今過所聞近代聲名出盧駱前朝筆墨數淵雲
與公家世由來事愧我初無百一分

送李質夫之陝府

平世求才漫至公悠悠羈旅士多窮十年見子尚短褐
千里隨人今北風戶外屨貧虛自滿樽中酒賤亦常空

共嫌欲老無機械心事還能與我同

次韻吳季野題岳上人澄心亭

高亭五月尚寒生回首塵沙自鬱蒸
砌水亂流穿石底攪雲高出蔽山層
躋攀欲絕人間世締構知從物外僧
腸胃坐來清似洗神奇未怪佛圖澄

送彥珍

挾筴窮鄉滿鬢絲陂田荒盡豈嘗窺
未應谷口終身隱正合菑川舉國推
握手百憂空往事還家一笑即芳時

柘岡定有辛夷發亦見東風使我知

寄張先郎中

留連山水住多時年比馮唐未覺衰
篝火尚能書細字郵筒還肯寄新詩
胡牀月下知誰對蠻榼花前想自隨
投老主恩聊欲報每瞻高躅恨歸遲

寄黃吉甫

朱顏去似朔風驚白髮多於野草生
挾策讀書空有得求田問舍轉無成
解鞍烏石岡邊坐攜手辛夷樹下行

今日追思真樂事黃塵深處走鷄鳴

卽席次韻微之泛舟

畫舸幽尋北果園應將陳迹問桑門地隨牆壁行多曲
天著岡巒望易昏故國時平空有木荒城人少半爲村
悠悠興廢皆如此賴付乾愁酒一樽

示長安君

少年離別意非輕老去相逢亦愴情草草杯盤供笑語
昏昏燈火話平生自憐湖海三年隔又作塵沙萬里行

欲問後期何日是寄書應見雁南征

次韻微之即席

釀成吳米野油囊却愛清談氣味長閒日有僧來北阜
平時無盜出南塘風亭對竹酬孤峭雪逕尋梅認暗香
江水中瀼應未變一杯終欲就君嘗

思王逢原三首

布衣阡陌動成羣卓犖高才獨見君杞梓豫章蟠絕壑
騏驎騷裊跨浮雲行藏已許終身共生死那知半路分

便恐世間無妙質
鼻端從此罷揮斤

蓬蒿今日想紛披
冢上秋風又一吹
妙質不為平世得
微言唯有故人知
廬山南墮當書案
湓水東來入酒卮
陳迹可憐隨手盡
欲歡無復似當時

百年相望濟時功
歲路何知向此窮
鷹隼奮飛鳳羽短
麒麟埋沒馬羣空
中郎舊業無兒付
康子高才有婦同
想見江南原上墓
樹枝零落紙錢風

季春上旬苑中即事

輦路行看斗柄東，簾垂殿閣轉春風。
樹林隱翳燈含霧，河漢欹斜月墜空。
新葢漫知紅簌簌，舊山常夢直叢叢。
賞心樂事須年少，老去應無日再中。

與微之同賦梅花得香字三首

漢宮嬌額半塗黃，粉色淩寒透薄妝。
好借月魂來映燭，恐隨春夢去飛揚。
風亭把盞酬孤艷，雪徑回輿認暗香。
不為調羹應結子，直須留此占年芳。

結子非貪鼎鼐嘗，偶先紅杏占年芳。
從教臘雪埋藏得

却怕春風漏洩香不御
鈿華知國色祇裁雲縷
想仙裝少陵為爾牽詩興
可是無心賦海棠

淺淺池塘短短牆
年年為爾惜流芳
向人自有無言意
傾國天教抵死香
鬢裏黃金危欲墮
帶圍紅蠟巧能裝
嬋娟一種如冰雪
依倚春風笑野棠

度麾嶺寄莘老

區區隨傳換
冬春夜半懸崖託此身
豈慕王遵能許國
直緣毛義欲私親
施為已壞生平學
夢想猶歸寂寞濱

風月一歌勞者事能明吾意可無人

送遜師歸舒州

山川相對一悲翁往事紛紛夢寐中邂逅故人恩意在
低徊今日笑言同看吹陌上陽花滿忽憶巖前蕙帳空
亦見桐鄉諸父老為傳衰颯病春風

次韻酬宋玘二首

洗雨次風一月春山紅漫漫綠紛紛褰裳遠野誰從我
散策空陂忽見君青眼坐傾新歲酒白頭追誦少年文

因嗟涉世終無補久使高材雍上聞

山陂疇昔從吾親諸父先生各佩紛零落長年誰語此
遲回故地却逢君衣冠偶坐論經術襁褓當時刺繡文
更怪高材終未遇有司何日選方聞

夢張劔州

萬里憐君蜀道歸相逢似喜語還悲江淮別業依何處
日月新阡卜幾時自說曲阿猶未穩即尋盆水去猶疑
茫然却是陳橋夢昨日春風馬上思

次韻張唐公馬上

揭節初悲力不任，賜身終愧謬恩臨。
病來氣弱歸宜早，偷取官多責恐深。
膏澤未施空謗怨，瘡痍猶在豈謳吟。
黃昏信馬江城路，欲訪何人話此心。

上元戲呈貢父

車馬紛紛白晝同，萬家燈火暖春風。
別開闔闔壺天外，特起蓬萊陸海中。
盡取繁華供俠少，祇分牢落與衰翁。
不知太乙遊何處，定把青藜獨照公。

和楊樂道見寄

宅帶園林五畝餘，蕭條還似茂陵居。
殺青滿架書新繕，生白當牕室久虛。
孤學自難窺奧密，重言猶得慰空疎。
相思每欲投詩社，只待春蒲葉又書。

次御河寄城北會上諸友

客路花時祇攪心，行逢御水半晴陰。
背城野色雲邊盡，隔屋春聲樹外深。
香草已堪回步履，午風聊復散衣襟。
憶君載酒相追處，紅萼青跼定滿林。

寄友人三首

萬里書歸說我愁，知君不忘北城幽。
一篇封禪才難學，三畝蓬蒿勢易求。
欲與山僧論地券，願為鄰舍事田疇。
應須急作南征計，漠北風沙不可留。

水邊幽樹憶同攀，曾約移居向北間。
欲語林塘迷舊逕，却隨車馬入他山。
飛花著地容難冶，鳴鳥窺人意轉閒。
物色可歌春不返，相思空復慘朱顏。

一別三年至一方，此身漂蕩只殊鄉。
看沙更覺蓬萊淺，

數日空驚霹靂忙
渺渺水波低
赤岸濛濛雲氣淡
扶桑登臨舊興無多在
但有浮槎意未忘

寄張諤招張安國金陵法曹

我老願為臧丈人
君今少壯豈長貧
好須自致青冥上
可且相從寂寞濱
深谷黃鸝驕引子
曲磻翠碧巧藏身
尋幽觸靜還成興
何必區區九陌塵

欲往淨因寄涇州韓持國

紫荊山下物華新
只與都城共一春
令節想君攜綠酒

故情憐我踏黃塵
汧魚已悔他年事
搏虎方收末路身
欲寄微言書不盡
試尋僧閣望西人

送別韓虞部

客舍街南初著巾
與君兄弟即相親
當年豈意兩家子
今日更為同社人
京洛風塵嗟阻濶
江湖杯酒惜逡巡
歸帆嶺北茫茫水
把手何時寂寞濱

懷舒州山水呈昌叔

山下飛鳴黃栗留
溪邊飲啄白符鳩
不知此地從君處

亦有他人繼我不塵土生涯休盡滌風波時事只飄浮
相看髮禿無歸計一夢東南即自羞

寄袁州曹伯玉使君

宜春城郭繞樓臺想見登臨把一盃
濕濕嶺雲生竹箇冥冥江雨熟楊梅
政成定入邦人詠詩就還隨驛使來
錯莫風沙愁病眼不知何日為君開

再至京口寄漕使曹郎中

漂流曾落此江邊憶與詩翁賦浩然

浩然堂名

鄉國去身猶

萬里驛亭分首已三年北城紅出高枝靚南浦青回老
樹圓還似昔時風露好只疑談笑在君前

次韻平甫金山會宿寄親友

天末海門橫北固烟中沙岸似西興已無船舫猶聞笛
遠有樓臺祇見燈山月入松金破碎江風吹水雪崩騰
飄然欲作乘桴計一到扶桑恨未能

次韻再遊城西李園

京師花木類多奇常恨春歸人未歸車馬喧喧走塵土

園林處處鏤芳菲殘紅已落香猶在羈客多傷渾自揮
我亦悠悠無事者約君聯騎訪郊圻

予求守江陰未得酬昌叔憶江陰見及之作

黃田港北水如天萬里風牆看賈船海外珠犀常入市
人間魚蟹不論錢高亭笑語如昨日末路塵沙非少年
強乞一官終未得祇君同病肯相憐

奉寄子思以代別

南北蹉跎成兩翁悲歡邂逅笑言同全家欲出嶺雲外

匹馬肯尋山雨中趨府折腰嗟踽踽聽泉分手惜怱怱
寄聲但有加飡飲才業如君豈久窮

留題微之廨中清輝閣

故人名字在瀛洲邂逅低回向北留鷗鳥一雙隨坐笑
荷花十丈對冥搜水涵樽俎清如洗山染衣巾翠欲流
宣室應疑鬼神事知君能復幾來游

元珍以詩送綠石硯所謂玉堂新樣者

玉堂新樣世爭傳況以蠻溪綠石鐫嗟我長來無異物

愧君特贈有佳篇久埋瘴霧看猶濕一取春波洗更鮮
還與故人袍色似論心於此亦同堅

金陵懷古四首

霸祖孤身取二江子孫多以百城降豪華盡出成功後
逸樂安知與禍雙東府舊基留佛剎後庭餘唱落船窓
黍離麥秀從來事且置興亡近酒缸

天兵南下此橋江敵國當時指顧降山水雄豪空復在
君王神武自難雙留連落日頻回首想像餘墟獨倚窓

却怪夏陽纔一韋漢家何事費罌缸

地勢東回萬里江雲間天闕古來雙兵纏四海英雄得
聖出中原次第降山水寂寥埋王氣風煙蕭颯滿僧窓
廢陵壞冢空冠劍誰復沾纓酹一缸

憶昨天兵下蜀江將軍談笑士爭降黃旗已盡年三百
紫氣空收劍一雙破堞自生新草木廢宮誰識舊軒窓
不須搔首尋遺事且倒花前白玉缸

次韻舍弟遇子固憶少迷

時舍弟
在臨川

歸計何時就一塵寒城回首意茫然野林細錯黃金日
溪岸寬圍碧玉天飛兔已聞追騷褭太阿猶恨失龍泉
遙知更憶河濱友從事能忘我獨賢

次韻答平甫

高蟬抱殼悲聲切新鳥爭巢諍語忙長樹老陰欺夏日
晚花幽艷敵春陽雲歸山去當簷靜風過溪來滿坐涼
物物此時皆可賦悔予千里不相將

金明池

宜秋西望碧參差憶看鄉人楔飲時斜倚水開花有思
緩隨風轉柳如癡青天白日春常好綠髮朱顏老自悲
跋馬未堪塵滿眼夕陽偷理釣魚絲

葛溪驛

缺月昏昏漏未央一燈明滅照秋床病身最覺風露早
歸夢不知山水長坐感歲時歌慷慨起看天地色淒涼
鳴蟬更亂行人耳正抱疎桐葉半黃

泛舟青溪入水門登高齋奉呈康叔

簿領紛紛惜此時起攜佳客散沈迷十圍但見諸營柳
九曲難尋故國溪牽隸欲隨流水遠放船終礙畫橋低
子猷清興何曾盡想憶高齋更一躋

九日登東山寄昌叔

城上啼烏破寂寥思君何處坐宮堯應須綠酒醺黃菊
何必紅裙弄紫簫落木雲連秋水渡亂山煙入夕陽橋
淵明久負東籬醉猶分低心事折腰

寄吳成之

綠髮溪山笑語中
豈知翻手兩成翁
辛夷屋角搏香雪
躑躅岡頭挽醉紅
想見舊山茅徑在
追隨今日板輿空
渭陽車馬嗟何及
榮祿方當與子同

寄曾子固

斗粟猶慙報禮輕
敢嗟吾道獨難行
脫身負米將求志
戮力乘田豈為名
高論幾為衰俗廢
壯懷難值故人傾
荒城回首山川隔
更覺秋風白髮生

寄王回深甫

少年倏忽不再得後日歡娛能幾何顧我面顏衰更早
憐君身世病還多牕間暗淡月含霧船底飄飄風送波
一寸古心俱未試相思中夜起悲歌

寄闕下諸父兄兼示平甫兄弟

父兄為學衆人知小弟文章亦自奇家勢到今宜有後
士才如此豈無時久聞陽羨溪山好頗與淵明性分宜
但願一門皆貴仕時將車馬過茅茨

鍾山西庵白蓮亭

山亭新破一方苔
白帝留花滿四隈
野豔輕明非傳粉
秋光清淺不憑材
鄉窮自作幽人伴
歲晚誰為靜女媒
可笑遠公池上客
却因松菊賦歸來

次韻舍弟賞心亭即事

檻折簷傾野水傍
臺城佳氣已消亡
難披梗莽尋千古
獨倚青冥望八荒
坐覺塵沙昏遠眼
忽看風雨破驕陽
扁舟此日東南興
欲盡江流萬里長

送張仲容赴杭州孫公辟

萬屋相誇漆與丹笑歌長在綺紈間綵船春戲城邊水
畫燭秋尋寺外山憶我屢隨遊客入喜君今赴辟書還
遙知曼倩威行久赤筆應從到日間

次韻春日即事

人間尚有薄寒侵和氣先薰草樹心丹白自分齊破蕾
青黃相向欲交陰潺潺嫩水生幽谷漠漠輕煙動遠林
病得一官隨太守班春無助愧周任

江上

村落家家有濁醪青旗招客解祇裯春風似補林塘破
野水遙連草樹高寄食舟車隨處弊行歌天地此身勞
遲回自負平生意豈是明時惜一毛

午枕

百年春夢去悠悠不復吹簫向此留野草自花還自落
鳴禽相乳亦相酬舊蹊埋沒開新徑朱戶欹斜見畫樓
欲把一盃無伴侶眼看興廢使人愁

寄石鼓寺陳伯庸

鯨海無風白日閒
天門當面險難攀
塵埃掉臂離長陌
琴酒和雲入舊山
仁義未饒軒冕貴
功名莫信鬼神慳
郭東一點英雄氣
時伴君心夜斗間

姑胥郭

誤褫雲巾別故山
抵吳由越兩間關
千家漁火秋風市
一葉歸舟暮雨灣
旅病惜惜如困酒
鄉愁脉脉似連環
情知帶眼從前緩
更恐顛毛自此斑

太湖恬亭

檻臨溪上綠陰圍溪岸高低入翠微日落斷橋人獨立
水涵幽樹鳥相依清遊始覺心無累靜處誰知世有機
更待夜深同徙倚秋風斜月釣船歸

次韻酬吳彥珍見寄

時彥珍為教授
學有石軍墨池

君作新詩故起予一吟聊復報雙魚杖藜高徑誰來往
散帙空堂自卷舒樹外鳥啼催晚種花間人語趁朝虛
春風處處堪攜手何事臨池苦學書

自金陵如丹陽道中有感

數百年來王氣消難將前事問漁樵苑方秦地皆蕪沒
山借揚州更寂寥荒墟暗雞催月曉空場老雉挾春驕
豪華祇有諸陵在往往黃金出市朝

讀詔書

度歷
七年

去秋東出汴河梁已見中州旱勢強日射地穿千里赤
風吹沙度滿城黃近聞急詔收羣策頗說新年又亢陽
賤術縱工難自獻心憂天下獨君王

除夜寄舍弟

一尊聊有天涯憶百感翻然醉裏眠酒醒燈前猶是客
夢回江北已經年佳時流落真何得勝事蹉跎只可憐
唯有到家寒食在春風同泛潁溪船

送王補之行風忽作因題四句於舟中

淮口西風急君行定幾時故應今夜月未便照相思

離蔣山

出谷頻回首逢人更斷腸桐鄉豈愛我我自愛桐鄉

江上

江水漾西風江花脫晚紅離情被橫笛吹過亂山東

秣陵道中口占二首

經世才難就田園路欲迷慙慙將白髮下馬照青溪
歲熟田家樂秋風客自悲茫茫曲城路歸馬日斜時

雜詠二首

證聖南朝寺三年到百回不知牆下路今日幾荷開
桃李石城塢餉田三月時柴荆常自閉花發少人知

梅花

牆角數枝梅凌寒獨自開遙知不是雪為有暗香來

歌元豐

豚栅雞埘晡晡間暮林搖落獻南山豐年處處人家好
隨意飄然得往還

九日

九日無歡可得追飄然隨意歷山陂蔣陵西曲
一作風面

塵慘

一作唐

也有黃花一兩枝

初晴

幅巾慵整露蒼華
度隴深尋一徑斜
小雨初晴好天氣
晚花殘照野人家

脩然

脩然三月閉柴荆
綠葉陰陰忽滿城
自是老年遊興少
春風何處不堪行

竹裏

竹裏編茅倚石根
竹莖疎處見前村
閒眠盡日無人到
自有春風為掃門

隨意

隨意柴荆手自開
沿岡度塹復登臺
小橋風露扁舟月
迷鳥羈雌竟往來

初夏即事

石梁茅屋有彎碕
流水濺濺度兩陂
晴日暖風生麥氣
綠陰幽草勝花時

光宅寺

梁武帝宅也其北齊安隔淮
齊武帝宅也宋興又在其地

齊安孤起宋興前
光宅相仍一水邊
蜂分蟻爭今不見

故窠遺堦尚依然

與寶覺宿龍華院絕句

舊有詩云京口瓜洲一水間鍾山只隔數重山春風

自綠江南岸明月何時照我還

世間投老斷攀緣
忽憶東遊已十年
但有當時京口月
與公隨我故依然

自定林過西庵

午鷄聲不到禪林
栢子煙中靜擁衾
忽憶西巖道人語
杖藜乘興得幽尋

謝安墩

我名公字偶相同我屋公墩在眼中
公去我來墩屬我不應墩姓尚隨公

山陂

山陂院落今按種城郭樓臺已放燈
白髮逢春唯有睡睡聞啼鳥亦生憎

北山有懷

香火因緣寄北山主恩投老更人間
傷心躑躅岡頭路

明日春風自往還

北陂杏花

一陂春水遶花身
花影妖嬈各占春
縱被春風吹作雪
絕勝南陌碾成塵

江梅

江南歲盡多風雪
也有江梅漏洩春
顏色凌寒終慘澹
不應搖落始愁人

北山

北山輸綠漲橫陂直塹回塘灩灩時細數落花因坐久
緩尋芳草得歸遲

楊柳

楊柳杏花何處好石梁茅屋雨初乾綠垂靜路要深駐
紅寫清波得細看

出郊

川原一片綠交加深樹冥冥不見花風日有情無處著
初迴光景到桑麻

呈陳和叔

數椽生草覆莓苔

一作數椽牢落長莓苔

一徑牆陰斲雪開玉匣

囊衣新徙舍杖藜從此為君來

數椽庫屋茨生草三畝荒園種晚蔬
永日終無一杯酒可能留得故人車

與耿天隲會話

邯鄲四十餘年夢相對黃粱欲熟時
萬事祇如空鳥迹怪君強記尚能追

庚申正月遊齊安

水南水北重重柳山後山前處處梅
未即此身隨物化年年長趣此時來

庚申正月遊齊安有詩云水南水北重重柳
壬戌正月再遊

招提詩壁漫黃埃忽忽籠紗兩過梅
老值白雞能不死復隨春色破寒來

壬戌正月晦與仲元自淮上復至齊安

風暖柴荆處處開
雪乾沙淨水洄洄
意行却得前年路
看盡梅花看竹來

悟真院

野水從橫漱屋除
午牕殘夢鳥相呼
春風日日吹香草
山北山南路欲無

鍾山晚步

小雨輕風落棟花
細紅如雪點平沙
槿籬竹屋江村路
時見宜城賣酒家

勸會賀蘭溪主

賀蘭溪洛京地名陳繹
買地築居於郵中問之

賀蘭溪上幾株松
南北東西有幾峰
買得住來今幾日
尋常誰與坐從容

書湖陰先生壁

茆簷長掃靜無苔
花木成畦手自栽
一水護田將綠繞
兩山排闥送青來

書何氏宅壁

有興提魚就公煮
此言雖在已三年
皖瀟終負幽人約

空對湖山坐惘然

示公佐

殘生傷性老耽書
年少東來復起予
各據槁梧同不寐
偶然聞雨落堦除

送黃吉父將赴南康官歸金谿二首

柘岡西路白雲深
想子東歸得重尋
亦見舊時紅躑躅
為言春至每傷心

還家一笑即芳辰
好與名山作主人
邂逅五湖乘興往

相邀錦繡谷中春

金陵即事三首

水際柴門一半開
小橋分路入青苔
背人照影無窮柳
隔屋吹香併是梅

結綺臨春歌舞地
荒蹊狹巷兩三家
東風漫漫吹桃李
非復當時仗外花

昏黑投林曉更驚
背人相喚百般鳴
柴門長閉春風暖
事外還能見鳥情

烏塘

烏塘渺渺綠平隄
隄上行人各有攜
試問春風何處好
辛夷如雪柘岡西

柘岡

萬事紛紛祇偶然
老來容易得新年
柘岡西路花如雪
迴首春風最可憐

金陵

金陵陳迹老莓苔
南北遊人自往來
最憶春風石城塢

家家桃杏過牆開

午枕

午枕花前簟欲流
日催紅影上簾鉤
窺人鳥喚悠颺夢
隔水山供宛轉愁

州橋

州橋蹋月想山椒
迴首哀湍未覺遙
今夜重聞舊鳴咽
却看山月詬州橋

觀明州圖

明州城郭畫中傳尚記西亭一樣船投老心情非復昔
當時山水故依然

和張仲通憶鍾陵二首

一夢章江已十年故人重見想皤然祇應兩岸當時柳
能到春來尚可憐

逸少池邊有一丘西山南浦慣曾遊殘年歸去終無樂
聞說章江即淚流

鍾山即事

澗水無聲繞竹流
竹西花草弄春柔
茅簷相對坐終日
一鳥不鳴山更幽

隴東西二首

隴東流水向東流
不肯相隨過隴頭
祇有月明西海上
作人征戍替人愁

隴西流水向西流
自古相傳到此愁
添却征人無限淚
怪來嗚咽已千秋

重將

重將白髮旁牆陰陳迹茫然不可尋
花鳥總知春爛漫
人間獨自有傷心

楚天

楚天如夢水悠悠
花底殘紅漫不收
獨遶去年揮淚處
還將牢落對滄洲

送和甫至龍安微雨因寄吳氏女子

荒煙涼雨助人悲
淚染衣巾不自知
除却春風沙際綠
一如看汝過江時

與北山人

蔣果疏泉帶淺山柴門雖設要常關別開小徑連松路
祇與鄰僧約往還

江寧夾口

落帆江口月黃昏小店無燈欲閉門側出岸沙楓半死
繫船應有去年痕

夜直

金爐香燼漏聲殘翦翦輕風陣陣寒春色惱人眠不得

月移花影上欄干

金陵報恩大師西堂方丈

蕭蕭出屋千竿玉
靄靄當牕一炷雲
心力長年人事外
種花移石尚慙勤

獨卧

茆簷午影轉悠悠
門閉青苔水亂流
百轉黃鸝看不見
海棠無數出牆頭

孟子

沉魄浮魂不可招
遺編一讀想風標
何妨舉世嫌迂濶
故有斯人慰寂寥

臘享

明星慘澹月參差
萬竅含風各自悲
人散廟門燈火盡
却尋殘夢獨多時

杏花

垂楊一徑紫苔封
人語蕭蕭院落中
獨有杏花如喚客
倚牆斜日數枝紅

泊姚江

山如碧浪翻江去水似青天照眼明
喚取仙人來住此
莫教辛苦上層城

遊鍾山

兩山松櫟暗朱藤一水中間勝武陵
午梵隔雲知有寺
夕陽歸去不逢僧

杭州望湖樓回馬上作呈玉汝樂道

水光山氣碧浮浮落日將歸又少留
從此祇應長入夢

夢中還與故人遊

春日席上

十年流落負歸期
臨水登山各有思
今日樽前千萬恨
不堪頻唱鷓鴣辭

戲贈育王虛白長老

白雲山頂病禪師
昔日公卿各贈詩
行盡四方年八十
却歸荒寺有誰知

無錫寄正之

健席高牆送病身
亂山荒隴障歸津
應須一曲千回首
西去論心更幾人

初晴

一抹明霞黯淡紅
瓦溝已見雪花融
前山未放曉寒散
猶鎖白雲三兩峰

越人以幕養花因遊其下

尚有殘紅已可悲
更憂回首祇空枝
莫嗟身世渾無事
睡過春風作惡時

鄞縣西亭

收功無路去無田竊食窮城度兩年更作世間兒女態
亂栽花竹養風煙

宋詩鈔卷十九